

29.01.2018. / 22:57h BiH - Objavljujemo

Demant Sindikata BH Telecoma na pisanje Vijesti.ba



Fikret Alić / Vijesti.ba

Na e-mail adresu redakcije portala Vijesti.ba dostavljen je demant Sindikata BH Telecoma na tekst "Enormna primanja i bezobrazne privilegije: Sindikat BH Telecoma ne štiti radnike nego beneficije", objavljen 29. januara 2018. godine. Demant, koji potpisuje "spoštovani" predsjednik Sindikata Fikret Alić, objavljujemo u cjelosti:



SINDIKAT BH TELECOMA-SARAJEVO
- VIJEĆE ZAPOSLENIKA -
Zmaja od Bosne 88 71000 Sarajevo, Bosna i Hercegovina
Tel: +38733 654067 ; Fax : +38733 654050
Mail : sindikat@bhtelecom.ba

Sarajevo, 29.01.2018.

Redakcija portala Vijesti.ba

Predmet: Obavještenje pred tužbu

Žao nam je što nismo u mogućnosti ovaj dopis početi s „Poštovana redakcijo“, jer se kod nas poštovanje ne podrazumijeva, nego se zaslužuje, a Vi to svojim izvještavanjem u vezi zahtjeva radnika BH Telecoma u posljednjih 7 dana, niste zaslužili.

Koristimo priliku da Vas obavijestimo da smo zbog velikog broja neistina iznesenih u više navrata na vašem portalu, prije svega o radnicima BH Telecoma, a onda i o Sindikatu i njegovom rukovodstvu, preko advokatskog tima Sindikata BH Telecoma pokrenuli niz privatnih tužbi protiv redakcije i novinara koji protivno novinarskoj etici u javnost iznose neprovjerene, netačne i jednostrane informacije, bez da se omogući očitovanje druge strane, tj. one o kojoj se piše.

Pored privatnih tužbi obavještavamo Vas da će Sindikat u ime 3.400 radnika pokrenuti tužbe za klevetu jer se u vašim tendencioznim tekstovima radnici BH Telecoma pokušavaju prikazati kao grupa koja uživa nezakonite ili velike privilegije, što je potpuno netačno i u službi je obmanjivanja javnosti, a nama radnicima stavlja metu na čelo.

Očekujemo da će naručilac ili autor tekstova koje samo Vi i još jedan, očigledno sponzorisani neobjektivni portal, objavljujete, preuzeti odgovornost i platiti vaše kazne i sudske troškove.

Nadamo se da će naš demanti biti u cjelosti objavljen uz izvinjenje onima kojima je vašim neistinama nanijeta šteta. U protivnom ćete neistine koje ste objavili morati da dokažete na sudu suočavajući se sa tužbama.



Predsjednik Sindikata BH Telecoma

Fikret Alić



SINDIKAT BH TELECOMA-SARAJEVO
- VIJEĆE ZAPOSLENIKA -
Zmaja od Bosne 88 71000 Sarajevo, Bosna i Hercegovina
Tel: +38733 654067 ; Fax : +38733 654050
Mail : sindikat@bhtelecom.ba

Sarajevo, 29.01.2018.g.

Redakcija portala Vijesti.ba

Demanti na članak objavljen na portalu Vijesti.ba „Enormna primanja i bezobrazne privilegije: Sindikat BH Telecoma ne štiti radnike nego beneficije“

Obraćamo Vam se povodom članka pod navedenim naslovom i koristimo svoje zakonsko pravo na objavu demantija, te Vas molimo da isti objavite u cjelosti, na isti način, u istom obimu i u istom trajanju kao i demantirani članak. Protivno novinarskoj etici u javnosti ste u više navrata iznijeli neprovjerene, netačne i jednostrane informacije, bez da ste omogućili očitovanje druge strane, tj. one o kojoj se piše, pa je onda jasna Vaša motivacija i nalogodavac Vaših tendencioznih tekstova.

U pomenutom članku ste naveli sljedeće:

„Za razliku od rudara kojima Sindikat ilustruje sav "jad i bijedu ove države", uposleni u ovoj kompaniji jedini još primaju jubilarnu nagradu, koja je rudarima i doktorima odavno ukinuta. Topli obrok je oko 13 KM dnevno, dok je recimo doktorima 8 KM. U BH Telecomu je i najveća radna satnica, veća nego kod zdravstvenih radnika, uključujući doktore.“

Prvi dio ovog navoda nećemo komentarisati, jer će isti biti predmet tužbe za klevetu i uvredu časti od strane Vašeg novinara.

Potpuna je neistina da samo radnici BH Telecoma primaju jubilarnu nagradu, ali s obzirom da ste naveli kome je ukinuta očigledno znate i kome nije, tako da je jasno kako ste zlonamjerno prečitali ovu činjenicu i tako bacili ljagu na naše radnike. Dalje, ako već znate da je doktorima topli obrok 8KM, onda ste ponovo prečitali kome je to topli obrok veći od 13KM, a takvih slučajeva ima. Ne sumnjamo da ste upoznati da je za utvrđivanje osnovne plaće neophodno poređenje koeficijenta. Da zaista želite istinito informisati javnost iznijeli bi i podatak o koeficijentima za platne razrede onih koje želite porediti. Tek tada se množenjem istih sa satnicom i brojem radnih sati dobija iznos plate za stručnu spremu. Tada možete praviti poređenja plaća i informisati javnost, jer ne postoji jedinstvena cijena radne satnice.

Dalje navodite: „Sindikat BH Telecoma ima razloga da štiti i regres koji je za oko 500 KM veći nego recimo kod državne administracije, dok se u realnom sektoru skoro pa i ne isplaćuje...“

Šta je tačno sporno u borbi Sindikata da štiti materijalna prava radnika. Trebamo li kao sindikat pognute glave pristati na umanjenja prava radnika, samo zato jer to traži predstavnik Vlade, oni koji plaćaju probrane medije i oni koji njihove stavove javnosti podmeću kao objektivne, tako misle i tako od nas traže? I ovdje ste pokazali visok stepen zle namjere, jer to što se regres na drugim mjestima rijetko ili nikako ne isplaćuje nikako nije naša krivica, niti bi bio isplaćen da je regres u BH telecomu manji..pa i za 500KM. Rado ćemo se razlike regresa odreći ako će nam neko obećati da će biti isplaćen u cijelom ili makar dijelu realnog sektora.

Navodite i sljedeće: „Rukovodstvo Sindikata štiti i privilegiju koja kaže da imaju najveću otpremninu u državi, koja za starije radnike može dosegnuti i 100 hiljada KM, a da to ne bude sve osim najveće otpremnine imaju čak i "simbolični" poklon u visini plate. I dok brojni građani traže "štelu" za posao u BH Telecomu, zaposleni u BH Telecomu traže štelu za otkaz pred kraj radnog vijeka upravo zbog visine otpremine.

Nikada nikome u BH Telecomu nije isplaćena otpremnina koju ste naveli u tekstu, a pogotovu ne nakon što bi dobio otkaz, koji nije rijedak slučaj u firmi. Otpremnine se u svakoj firmi pa tako i u BH Telecomu isplaćuju prilikom odlaska u penziju i one iznose u skladu sa Zakonom o radu do šest (6) prosječnih plaća. Pored toga postoji mogućnost da radnik odlaskom u penziju dobije i poklon do iznosa jedne prosječne plate. Zato bi samo budala tražila otkaz, radi otpremnine koje nema.

Još ste naveli: „... tu su i privilegije poput naknade za školovanje djece, slobodni dani za preseljenje i krećenje te maksimalni godišnji odmori“.

Nije tačno da radnici BH Telecoma imaju naknadu za školovanje djece i to je apsolutna laž. Također nije istina da radnici BH Telecoma imaju slobodne dane za krećenje, a dužina godišnjeg odmora je ograničena zakonom i ne može biti veća od 30 dana, tako da je godišnji odmor u BH Telecomu kao i u svim drugim kompanijama.

Na kraju, iznošenje ličnih podataka o mojim primanjima, bez mog odobrenja, bit će riješeno privatnom tužbom protiv vašeg novinara i redakcije portala.



Predsjednik Sindikata BH Telecoma

Fikret Alić

Fikret Alić